

摘藻堂四庫全書薈要

集部

欽定四庫全書薈要

集部

宋詩鈔卷一百

四至
六

詳校官候選知縣臣吳甸華



欽定四庫全書薈要卷二萬三百五十七

集部

宋詩鈔卷一百四

內閣中書舍人吳之振編

真山民詩鈔

山民不傳名字亦不知何許人也但自呼山民云
李生喬嘆以為不愧迺祖文忠西山以是知其姓真
矣痛值亂亡深自湮沒世無得而稱焉惟所至好題
詠因流傳人間然皆探幽賞勝之作未嘗有江湖酬

應語也不惟吳許上通於天即自命遺民而以詩文
通當世者視山民才節亦足愧耻矣張伯子謂宋末
一陶元亮非過論也

幽居雜興

松桂小菟裘山扉幽更幽蜂王衙早晚燕子社春秋
髻禿難遮老心寬不貯愁年來把鋤手無復揖公侯

新春

餘凍雪初乾初晴日驟暄人心新歲月春意舊乾坤烟

碧柳出色燒青草返魂東風無厚薄隨例到衡門

光霽閣晚望

一閣納萬象危闌俯渺茫白沙難認月黃葉易為霜宿
鳥投煙嶼歸樵趁野航孤吟誰是伴漁笛起滄浪

興福寺

為厭市喧雜攜詩來此吟鳥聲山路靜花影寺門深樓
閣莊嚴界池塘清淨心松風亦好事送客出前林

夏晚江行

行盡山頭路江空帶夕暉風蟬聲不定水鳥影同飛蕭
散烏藤杖輕鬢白苧衣試呼垂釣者分我半苔磯

修真院訪崔道士

竹扉蒼蘚牆林下小丹房風定香烟直月斜簾影長淪
茶泉味別點易露痕香安得棲塵外求師却老方

春遊和胡叔芳韻

春光潑眼明占勝得新亭棠醉風扶起柳眠鶯喚醒非
無盃泛綠安得鬢皆青且事日為樂歌聲莫暫停

山亭避暑

怕礙清風入丁寧莫下簾地皆宜避暑人自要趨炎竹
色水千頃松聲風四簷此中有幽致多取未傷廉

三山旅夜

獨坐本無況淒涼更旅中檻低簷礙月窗破紙吟風隣
館笛三弄譙樓鼓二通半觴聊自適新荔擘輕紅

枕上偶成

長夜更難曉天寒吟思清夢魂山館枕燈影雪窗檠守

拙疎生理安貧識世情淒風響簷竹豈是不平聲

泊白沙渡

日暮片帆落渡頭生暝烟與鷗分渚泊邀月共船眠燈
影漁舟外湍聲客枕邊離懷正無奈況復聽啼鵑

夜話無上人房

蒲團一榻上坐到夜將分窗月燈昏見巖猿雨歇聞茶
甌勝飲酒禪語當論文只恐紅塵迹浣師松下雲

獨坐

寒齋淡無味孤坐思悠悠時事三緘口年光一轉頭有
書遮老眼無藥療閒愁假使丹心在衰遲也合休

春日

韶光今幾許我欲問流鶯花影掃不去草根鋤又生心
安諸妄息身老萬緣輕正是春風好幽蘭不肯爭

曉行山間

出門誰是伴只約瘦藤行一二里山逕兩三聲曉鶯亂
峯相出沒初日乍陰晴僧舍在何許隔林鐘磬清

間次季芳宿韻

好山多在眼塵事少關心風竹有聲畫石泉無操琴許
猿分野果留鶴守雲林不是閒邊客誰來此地吟

春感

春光元自好我却為春愁但見柳青眼不如人白頭一
身浮似寄百歲去如流賴有芳樽在花前日醉遊

春曉園中

綠陰留我立清曉小闌東林外一鳩雨柳邊雙燕風吟

懷愁渺渺春事去匆匆莫恨芳菲盡葵榴花又紅

溪行

春暖溪西路行吟又幾回水清明白鷺花落失青苔雲
過日吞吐樹搖風往來漁歌聽未了欲去又徘徊

渡江之越宿蕭山縣

昨夜大江舟今宵小驛樓隻身千里客孤枕一燈秋市
酒難成醉鄉書莫寄愁胸中無史記浪作會稽遊

宿寶勝寺

苦吟吟未了只向兩廊行月去塔無影風來鐸有聲塵
心隨水淨佛眼共燈明安得雲邊住與僧分此情

閒居

虛明兩竹窗濟楚一書房風動鳥移樹花香蝶過牆身
安知病少晝靜覺春長未必全無事終焉也勝忙

兵後寓舍送春

觸景多懷舊凭欄易愴神飛花遊蕩子古木老成人世
換山如醉田荒草自新鄉關渺何處回首暗風塵

兵後劉秀寬見過

冉冉歲云暮閒居安所之途窮身是累痛定語猶悲衰
鬢數莖雪空囊一卷書儒衣例如此惜也不逢時

清明

清明今日是原上一經過新葬塚無數未來人更多此
生曾悟否不樂復如何莫待澆墳土樽前且醉歌

臨江曉行

茅舍亂雞聲疎林淡見星霜輕留草綠霧暗失山青蹤

跡去來燕交遊聚散萍浮生原是客不必恨飄零

舟中峽口

亂山如碧玉處處見鶉花水漲傍分港舟行倒走沙宿
依沽酒市飯過釣魚家喜脫風波險推篷數暝鴉

次韻章劒溪山居

想無書赴隴林鶴莫驚猜曳杖雲同出開簾山自來池
堪供洗硯籬不礙觀梅靜倚長松立藤花點翠苔

夏日

虛窗暑亦涼
境靜晝偏長
樹色烟明滅
蟬聲風抑揚
家貧書是業
身老睡為鄉
赤日黃埃客
紛紛為底忙

宋道士同遊白雲關

扶攜方外友
來入白雲關
八九峯如畫
兩三人倚欄
棋聲敲竹外
簾影落花間
一曲瑤琴罷
翠陰生晝寒

妙因寺次施敬所韻

松蘿一徑陰
踏破白雲深
約客分茶供
逢僧倚竹吟
鼠留香篆跡
禽和閣鈴音
話久不知晚
新螢照出林

晚春

有恨青春老無營白晝長
葉新林換綠花落地生香
雨意一番足人家百事忙
為儒竟成誤悔不早農桑

冬雪

雪凍飛禽少林深落葉多
寒塘倒山影空谷答樵歌
不
有梅花在其如詩思何
霜風吹落帽應歎鬢絲皤

新涼

烟火林幽處田園秋暮時
深村人到少閨月稻黃遲
旋

決渠分水新編竹補籬地爐煨芋栗莫遣貴人知

江樓秋夕

樓高古城遶無奈漏聲催幽夢風吹斷新吟月送來江
長漁唱遠雲冷雁聲哀明日重陽酒黃花開未開

初夏訪劉道士

白雲隨杖屨伴我到山房暑薄疑天別林深見路長
芝皆道味花竹亦詩香更待荷開後來分半榻涼

春行

東風物物新花外步清晨蕉葉卷舒雨鳩聲問答春園
林三月景詩酒百年身試數交遊侶如今有幾人

孤標上人留宿

山僧留我宿我亦似山僧香茗半甌雪寒鑿一飭冰廊
風響黃葉壁雨暗青燈參透詩三昧何須契一乘

李修伯山居

寒燈幾撥盡借問夜何其舊夢青燈在新愁白髮知昔
為三遶鵲今作五藏龜多謝梅梢月留人得睡遲

道逢過軍投宿山寺

窮途欲馬往薄暮此相投
蟋蟀數聲雨芭蕉一寺秋
鄉關來枕畔時事上眉頭
長歎為僧好今逢更說愁

蘭溪舟中

一舸下中流西風兩岸秋
櫓聲搖客夢帆影挂離愁
落日魚鰕市長烟蘆荻洲
篙人夜相語明發又嚴州

春曉雨

破曉簷花未放乾披衣和夢倚欄干
釀成苔暈地猶濕

老盡鶯聲風正寒無客醉敲金鐙響有人睡怯翠衾單
牡丹一夜成消瘦下却珠簾不忍看

西湖圖

兩袖春風一杖藜等閒踏破柳橋西雲開遠嶂碧千疊
雨過落花紅半溪青旂有情邀我醉黃鶯無恨為誰啼
東城正在桃林外多少遊人逐馬蹄

遊鳳棲寺

十載重遊古鳳棲蓮宮新遶綠楊堤欲談世事佛無語

不管客愁禽自啼
苔滑空廊妨散步
塵昏老壁失留題
僧家山地鄰家種
菜甲春生綠滿畦

漁浦晚秋旅懷

西風吹夢越中遊
剪剪輕寒入短裘
雁字不將鄉信寫
蛩聲空和旅吟愁
郵亭冷雨孤燈夜
漁市斜陽一笛秋
是處山川即吾土
仲宣何用怯登樓

泊舟嚴灘

天色微茫入暝鐘
嚴陵湍上繫孤篷
水禽與我共明月

蘆葉同誰吟晚風隔浦人家漁火外滿江愁思笛聲中
雲開休望飛鴻影身即天涯一斷鴻

連城春夜留別張建溪

飛絮遊絲客子心連城那忍遽分襟青燈應見詩情苦
濁酒不如交味深一榻暖風棲竹屋半闌淡月立花陰
離懷今夜先收拾盡付明朝馬上吟

夜坐

匹馬平生汗漫游如今寂寞老林丘小窗半夜青燈雨

幽樹一庭黃葉秋，懶看世情寧睡去。
怕傷時事莫吟休，寒蛩可是知人意。
未到莎根，只說愁。

初冬

林葉新經數夜霜，地爐獨擁一山房。
塵書邀我共高閣，濁酒勸人歸醉鄉。
費省家貧還似富，身閒日短亦如長。
梅花苦欲催吟興，又破梢頭半點香。

東粵廟

頽欄斜照網蛛絲，陳迹淒涼萬古悲。
柘水尚鳴亡國怨。

山松曾見受封時碑因苔蝕無完字城為田侵失舊基
當日東甌知幾戰如今贏得一荒祠

歲暮

顏不常朱鬢易斑流光難駐兩跳丸一年又是等閒過
百歲只消如此看把酒何會長在手種桃能得幾凭欄
癡人醉夢不知醒日夜雙眉抵死攢

三峯寺

寂寞烟林噪亂鴉青鞋步入野僧家雲深不礙鐘聲出

日轉還移塔影斜廊下蝸粘
汭蘚佛前蜂戀插瓶花
竹床紙帳清如水一枕松風
聽煮茶

江頭春日

春暖旗亭煮酒香醉醒始悟
是他鄉駕言行邁路千里
豈不懷歸天一方春事漸消
鶯語老離愁偏勝柳絲長
無聊莫向城南宿淡月梨花
正斷腸

次韻潘恕堂見寄

抱甕區區老漢陰空齋擁鼻
日長吟青山隔截市朝面

白髮消磨豪傑心書既不成休學劒貴無可買耻言金
情知難入鴛鴦侶賴有鷗盟尚可尋

初夏

一葉薰風帶暑回雨天濃翠與庭槐不隨春去鶯猶在
好競時粧榴又開剪尺旋裁新白苧杯盤聊薦舊青梅
篋中敝扇投閒久依舊團團入手來

夜飲趙園次徐君實韻

銀臺絳蠟淚成堆四面軒窗盡放開花影忽生知月到

竹梢微響覺風來豪揮彩筆詩千首醉倚紅妝酒百杯
遊玩未闌歸未得高城漏箭幾相催

幽棲

鶴護松扉久不開蒲團端坐思悠悠故交只向夢中見
閒事不經心上來雙屐躡雲春採藥一筇掛月夜觀梅
東風似見山童懶自與幽人掃徑苔

聖果院訪忠上人不值

管領東風入杖藜落梅香裏已招提苔痕一徑白雲濕

花影半窗紅日低欲見高僧聊爾耳便乘餘興去來兮
葛藤有話無人共付與隔林幽鳥啼

山行

林梢初日弄陰晴露浥溪花笑欲迎澗暗只聞泉滴瀝
山青剩見鷺分明遠峯忽轉還如遠險徑徐行亦似平
莫謂詩成無與和風篁也解作吟聲

秋夜次葉一山韻

自笑秋來似轉蓬偶然飛落過山中一燈幽館菊花雨

孤枕小樓梧葉風涉世悠悠旋磨蟻懷人杳杳寄書鴻
浮生何預光陰事抵死相催作老翁

杜鵑花得紅字

愁鎖巴雲往事空只將遺恨寄芳叢歸心千古終難白
啼血萬山都是紅枝帶翠烟深夜月魂飛錦水舊東風
至今染出懷鄉恨長掛行人望眼中

永嘉秋夕

風戰枯桐敲紙窗擁裘無寐夜偏長譙樓三鼓夜將午

雲雁數聲天正霜
寓世此身驚逆旅
寬懷何處不吾鄉
江頭風景日堪醉
酒美蟹肥橙橘香

客中遇鄉友李芳遠歸省親

河梁邂逅話襟期
獵獵西風透袂衣
酒臉未隨紅葉醉
鄉心先逐白雲飛
客中送客難為別
山上安山胡不歸
借使家書君可寄
此間無復問庭幃

山人家

片雲隔斷嶂西風
三兩山花屋角紅
幾畝桑麻春社後

數家雞犬夕陽中拾薪澗底青裙婦倚杖簷間白髮翁
我亦願來同隱者種桃早晚趁東風

朱溪澗

路轉峰回又一村天寒大半掩柴門雲融山脊嵐生翠
水潑沙洲樹出根任擁重裘風亦冷未投荒店月先昏
今宵只傍梅花宿贏得清芬入夢魂

閒中

敢咎章縫解誤人甘於閒處着閒身腹中書在溫仍熟

夢裏詩成記不真引鶴徐行三徑曉約梅同醉一壺春
今朝有喜誰知得新換銜頭號散民

冬暮小齋

布襪青鞋敝絮袍松扉柴几小衡茅雲酣纔釀臍三月
梅吐又橫春一梢炭為驟寒偏索價酒因不飲懶論交
窮年兀兀從人笑未用多方作解嘲

宿南峰寺

禪房花木鎖深幽借與詩人信宿留幡影分來半廊月

磬聲敲破一林秋。僧偏好事能青眼。佛本無心亦白頭。
試問青松峰外鶴。閒邊曾見幾人遊。

春曉山行

風掃連陰出快晴。瘦筇伴我出山扃。路從初日紅邊過。
人在野花香裏行。古水殊無趨世態。幽禽懶作弄春聲。
棕鞋踏遍山南北。只與白雲相送迎。

幽興

不賦千鍾賦。一簞天公有意養。痴頑書猶能看。未曾老。

詩亦莫吟方是閒
寬著庭除貪貯月
少栽竹樹要觀山
空階兩日無行迹
又上苔花幾點斑

梅仙山

梅福鍊
丹地

西都不知壽安用
獨長年縱有丹爐
在難吹漢火燃

吉水夜泊

入夜始維舟黃蘆
古渡頭眠鷗知讓
客飛過蓼花洲

草

草枯根不死春到
又敷榮獨有愁根
在非春亦自生

楊妃

三郎掩面馬嵬坡生死思深可奈何
瘞土驛傍何足恨
潼關戰處骨埋多

年少遊春

錦袍朱帶玉花驄著意追歡紫陌東
只道春風屬楊柳
不知楊柳有秋風

三月晦日

九十風光能有幾東風遽作遠行人
樽前莫惜今朝醉

明日鶯聲不是春

晚步

未暝先啼草際蛩石橋暗度晚花風
歸鴉不帶殘陽老
留得林梢一抹紅

春歸詞

愁鎖眉尖未肯消何心更待兩娥嬌
一春螺黛渾無用
付與東風染柳條

山間秋夜

夜色秋光共一闌
飽收風露入脾肝
虛簷立盡梧桐影
絡緯數聲山月寒

新年

妝點春光到眼邊
凍消殘雪暖生烟
杏桃催換新顏色
惟有寒梅老一年

九日

懶把黃花插滿頭
正緣老大見花羞
年來頗恨儒冠悞
好倩西風吹去休

醉餘再賦

堪嘆詩翁酒興豪
醉餘猶復一登高
西風抵死相搖撼
爭奈儒冠裏得牢

宋詩鈔卷一百四

欽定四庫全書薈要卷二萬三百五十八

集部

宋詩鈔卷一百五

內閣中書舍人吳之振編

汪元量水雲集鈔

元量字大有號水雲錢塘人以善琴事謝后王昭儀宋亡隨三宮留燕後為黃冠師南歸幼主平原公及從降駙馬右丞楊鎮丞相吳堅留夢炎參政家鉉翁文及翁提刑陳杰與王昭儀清惠以下廿有九人

賦詩餞之後往來匡廬彭蠡間世莫測其去留危太
史素謂其長身玉立修髯廣額而音若洪鐘江右人
以為神仙多畫其像祀之詩多紀國亡北徙事與文
丞相獄中倡和作周詳惻愴人謂之詩史鄭明德陶
九成瞿宗吉所載僅數首虞山錢遵王得之雲間鈔
書舊冊錄為水雲集

湖州歌九十八首

丙子正月十有三
撾鞞伐鼓下江南
皋亭山下青烟起

宰執相看似醉酣

萬馬如雲在外間
玉階仙仗罷趨班
三宮北面議方定
遣使皋亭慰伯顏

殿上羣臣嘿不言
已延丞相趣降箋
三宮共在珠簾下
萬騎虬鬚遶殿前

謝了天恩出內門
駕前喝道上將軍
白旄黃鉞分行立
一點猩紅似幼君

一舸吳山在眼中
樓臺疊疊間青紅
錦帆後夜烟江上

手抱琵琶憶故宮

北望燕雲不盡頭
大江東去水悠悠
夕陽一片寒鴉外
目斷東西四百州

十數年來國事乖
大臣無計逐時挨
三宮今日燕山去
春草淒淒上玉階

錦帆高揭繡簾開
鼉鼓聲悲鳳管哀
月子纖纖雲裏見
吳江不盡莫潮來

一出宮門上畫船
紅紅白白艷神仙
山長水遠愁無那

又見江南月上弦

太湖風起浪頭高
錦柁搖搖坐不牢
靠着篷窗垂兩目
船頭船尾爛弓刀

昨夜三更淚濕腮
五胥何事夢中來
三宮從此相分別
自勒潮頭白馬迴

受降城下草離離
寒食清明只自悲
漢寢秦陵何處在
鶯花無主雨如絲

金陵昨夜有降書
更說揚州一戰輸
淮北淮南清未了

又添軍馬下東吳

鐵甕城頭馬亂嘶
金陵城下砲如飛
黑風捲地鼓聲急
昨夜常州又受圍

曉來宮擢去如飛
掠髮鬟雲淺畫眉
風雨淒淒能自遣
三三五五坐彈碁

暮雨瀟瀟酒力微
江頭楊柳正依依
宮娥抱膝船窗坐
紅淚千行濕繡衣

曉鬢鬢鬆懶不梳
忽聽人說是南徐
手中明鏡拋船上

半揭篷窗看打魚

京口沿河賣酒家東邊楊柳北邊花
柳搖花謝人分散
一向天涯一海涯

滿船明月夜鳴榔船上宮人燒夜香
好是燒香得神力
片帆穩送到漁陽

一片淮山落照中開船忽遇打頭風
行軍元帥傳言語
別撥官軍下浙東

揚子江頭潮退遲三宮船傍釣魚磯
須臾風定過江去

新鬼啾啾舊鬼啼

不堪回首淚盈盈萬里淮河聽雨聲
莫問萍蓬併豆粥且餐麥飯與魚羹

牢執連鑣向北行淮西夜夜鬼燈青
雖然適意無南北生死難逃篩下星

更闌炙燭繡筵遮卸却金鈿與翠花
心似亂絲眠不得江樓中夜咽悲笳

兩淮極目草芊芊野渡灰餘屋數椽
兵馬渡江人走盡

民船拘斂作官船

宮人清夜按瑤琴不識明妃出塞心
十八拍中無限恨轉弦又奏廣陵音

青天澹澹月荒荒兩岸淮田盡戰場
宮女不眠開眼坐更聽人唱哭襄陽

翠鬟半髲倦梳粧楊柳風前陣陣涼
絃索懶拈縮纖手龍涎猶嚼口脂香

鳳管龍笙處處吹都民歡樂太平時
宮娥不識興亡事

猶唱宣和御製詞

可憐河畔草青青錦纜牽江且緩行愛此淮南山水好
問天乞得片時晴

丞相催人急放舟舟中兒女淚交流淮南漸遠波聲小
猶見揚州望火樓

撥盡琵琶意欲悲新愁舊夢兩依依江樓吹笛三更後
細奈林間杜宇啼

一半淮江半浙江怒潮日夜自相撞揚州昨夜軍書至

說道淮安未肯降

曉來潮信暫相留
滿耳驚濤愁復愁
月殿不知何處在
錦帆搖曳到揚州

金屋煌煌麗九天
朝歌夜舞艷神仙
尋常只道西湖好
不識淮南是極邊

風雨聲中聽擢歌
山魚野饌奈愁何
雪花堆白甜如蜜
不減江珧滋味多

九尺瓊花一夜開
無雙亭曲小徘徊
可憐后土空祠宇

望斷韋郎不見來

兩淮戰鼓不停撾
萬騎精兵賽夜叉
破陣焚舟彈指頃
漢人猶懼夏爺爺

官軍兩岸護龍舟
麥飯魚羹進不休
宮女垂頭空作惡
暗拋珠淚落船頭

都人不識有干戈
羅綺叢中樂事多
一夜月明天漠漠
漢人歌罷楚人歌

太皇太后過江都
遙指淮山是畫圖
拋却故家風雨外

夜來歸夢遶西湖

萬騎橫江泣鼓鞞
千枝畫角一行吹
淮南今夜好明月
船上美人空淚垂

蘆荻颼颼風亂吹
戰場白骨暴沙泥
淮南兵後人烟絕
新雨燈前醉玉妃

篷窗倚坐酒微酣
淮水無波似蔚藍
雙櫓咿啞搖不住
望中猶自是江南

銷金帳下忽天明
夢裏無情亦有情
何處亂山可堆骨

暫時相對坐調笙

宮人夜泊近人家
瞥見紅榴三四了
猶說初離行在所
玉蘭無數牡丹花

絲雨綿雲五月寒
淮堧遺老笑儒冠
行軍元帥來相探
折送駝峯炙一盤

江南楊柳舞婆娑
萬馬成羣嚙短莎
北客醉中齊拍手
隔船猶唱采茶歌

長淮風定浪濤寬
錦櫂搖搖上下灣
兵後人烟絕稀少

可勝戰骨白如山

使臣開閫過高郵楊柳絲絲拂去舟宮女推篷猶自笑
閒拋金彈打沙鷗

邵伯津頭閫未開山城鼓角不勝哀一川霞錦供行客
且掬荷香進酒杯

北風吹雨入篷間宮女腰肢瘦怯寒阿監隔船相借問
計程今日到淮安

寶應城南柳數株葭墻艾席是民居眼前境逆無詩興

忽有小舟來賣魚

船泊邳州古岸傍
斜風細雨送昏黃
美人十十船中坐
猶把金猊注好香

徐州城上覓黃樓
四壁詩章讀不休
更欲登臺看戲馬
州官攜酒共嬉遊

歌風臺畔水泔泔
地面官人餽酒葷
宮女上船嬉一霎
不禁塵土污衣裙

新濟州來舊濟州
柳門西畔兩三鷗
酒邊笑謔消長日

弄竹彈絲盡勝流

一更船泊鄆州城城外巡軍夜柝鳴如此月圓如此客
猶能把酒到天明

琵琶切切更嘈嘈高柳羣蟬逐不號一片夕陽無限好
汶河西上酒樓高

錦帆百幅礙斜陽遙望陵州里許長車馬爭馳迎把盞
走來船上看花娘

兀兀篷窗坐似禪景州城外更淒然官河宛轉無風力

馬曳驢拖鼓子船

灌州河水曲如弓
青草坪邊官向東
船過州南忽奇絕
一如湖上藕花風

船到滄州且少留
客來同上酒家樓
沿河樹折棗初剝
滿地藤枯瓜未收

牙檣暫住獻州城
鷺去歸來管送迎
臥笑宮人擲骰子
金錢癡咒卜輸贏

日中轉舵到河間
萬里羈人強自寬
此夜此歌如此酒

臨安月色好誰看

長蘆轉舵是通津盡是東西南北人日暮烟花簫鼓鬧
紅樓爛醉楚州春

恰到揚邨舊馬頭北風吹雨便成秋嗚嗚鬼物敗人興
掩却篷窗且睡休

滿朝宰相出通州迎接三宮宴不休六十里天圍錦帳
素車白馬月中游

會同館裏紫蒙茸蘭麝飄來陣陣風簫鼓沸天迴雁舞

黃羅帳幔燕三宮

皇帝初開第一筵天顏問勞意綿綿大元皇后同茶飯
宴罷歸來月滿天

第二筵開入九重君王把酒勸三宮駝峯割罷行酥酪
又進椒盤剝嫩葱

第三筵開在蓬萊丞相行杯不放杯割馬燒羊燉解粥
三宮宴罷謝恩迴

第四筵開在廣寒葡萄酒釀色如丹并刀細割天雞肉

宴罷歸來月滿鞍

第五筵開在北亭三宮轆轤引酒吸長虹金盤堆起胡羊肉
樂指三千響碧空

第六筵開在禁庭蒸麋燒鹿薦杯行三宮滿飲天顏喜
月下笙歌入舊城

第七筵排極整齊三宮遊處軟輿提杏漿新沃燒熊肉
更進鵠鶉野雉雞

第八筵開在北亭三宮豐燕已恩榮諸行百戲都呈藝

樂局伶官叫點名

第九筵開盡帝妃三宮端坐受金卮
須臾殿上都酣醉拍手高歌舞雁兒

第十瓊筵敞禁庭兩邊丞相把壺瓶
君王自勸三宮酒更送天香近玉屏

一人不殺謝乾坤萬里來來謁帝闈
高下受官隨品從九流藝術亦沾恩

僧道恩榮已受封上庠儒者亦恩隆
福王又拜平原郡

幼主新封瀛國公

金屋粧成物色新
三宮日用御厨珍
其餘宮女千餘箇
分嫁幽州老斲輪

每月支糧萬石鈞
日支羊肉六千斤
御厨請給葡萄酒
別賜天鵝與野麇

三宮寢室異香飄
貂鼠氈簾錦繡標
花毯褥裯三萬件
織金鳳被八千條

客中忽忽又重陽
滿酌葡萄當菊觴
謝后已叨新聖旨

謝家田土免輸糧

雪裏天家賜炕羊兩壺九醞紫霞觴三宮夜給千條燭
更賜高麗黑玉香

三殿加餐強自寬內家日日問平安大元皇后來相探
特賜絲綉二百單

萬里修途似夢中天家賜予意無窮昭儀別館香雲煖
自把詩書授國公

萬里羈孤夜憶家邊城吹角更吹笳須臾勅使傳言語

今日天庭賞雪花

雪子飛飛塞面寒
地爐石炭共團欒
天家賜酒十銀甕
熊掌天鵝三玉盤

江南郡守列金階
內裏華筵日日排
文武官僚多二品
還鄉盡帶虎頭牌

四川督帥尚簷豪
萬馬來燕貢一遭
奏授虎符三百面
內家更賜織金袍

九重寶燭照簾櫳
三殿乘輿去賀冬
金面垂慈多喜色

史官書瑞奏年豐

曉望燕雲正雪天
閉門擅帳恣高眠
內家遺鈔三千錠
添賜三宮日用錢

東宮雪裏燕三宮
妃子殷勤把酒鍾
百十箜篌彈玉指
兩行珠翠擊金鏞

夜來酒醒四更過
漸覺衾裯冷氣多
踏雪敲門雙勅使
傳言太子送天鵝

兩下金欄障御階
異香縹緲五門開
都人罷市從容立

迎接南朝駙馬來

杭州萬里到幽州百咏歌成意未休
燕玉偶然通一笑歌喉宛轉作吳謳

越州歌

淮南四畔草離離萬檝千艘水上飛
旗幟蔽江金鼓震巴延丞相過江時

東南半壁日昏昏萬騎臨軒趣幼君
三十六宮隨輦去不堪回首望吳雲

一陣西風滿地烟
千軍萬馬浙江邊
官司把斷西興渡
要奪漁船作戰船

西峯雲鎖幾時開
昨夜京城戰鼓哀
漁父生來載歌舞
滿頭白髮見兵來

秋風吹雨暗天涯
越鳥巢翻何以家
嶺上萬松都斫盡
西湖新路欲排叉

師相平章誤我朝
千秋萬古恨難銷
蕭牆禍起非今日
不賞軍功在斷橋

蒼生慟哭入雲霄
內苑瓊林已作樵
打斷六更天未曉
禁庭兩桁粃盤燒

魯港當年傀儡場
六軍盡笑賈平章
三聲鑼響三更後
不見人呼大魏王

脫却黃袍心莫欺
魏王事業止于斯
孤舟走過揚州去
表奏朝廷乞太師

賈廟巍巍盡勅封
秦齊兩國受恩同
木綿庵下無依鬼
合策麒麟第一功

集芳園裏策奇功丞相南行面發紅留得紫綿三百曲
風吹雨打併成空

羣臣上疏納忠言國害分明在目前只論平章行不法
公田之後又私田

甲子初秋柳宿乖皇天無雨只空雷正當七月初三夜
帝勸長星酒一杯

絲風毛雨共淒涼燕子樓空恨恨長今日客逢新酒熟
夜來春去落花忙

月夜湖歌歌正長船來船去水茫茫上塘歌了下塘唱
更唱吳王與越王

昨夢吳山閨苑開風吹仙樂下瑤臺翠圍紅陣知多少
半揭珠簾看駕來

鰲山燈月照人嬉宣德門前萬玉妃記得那年三五夜
快行擎駕到行歸

內湖三月賞新荷錦纜龍舟緩緩拖醉裏君王宣樂部
隔花教唱採蓮歌

年年宮柳好春光
百轉黃鸝遶建章
冶杏天桃紅勝錦
牡丹屏裏燕諸王

苦夢吳山列御筵
三千宮女燭金蓮
而今莫說夢中夢
夢裏吳山只自憐

醉歌

呂將軍在守襄陽
十載襄陽鐵脊梁
望斷援兵無信息
聲聲罵殺賈平章

援兵不遣事堪哀
食肉權臣大不才
見說襄樊投拜了

千軍萬馬過江來

淮襄州郡盡歸降
鞀鼓喧天入古杭
國母已無心聽政
書生空有淚成行

六宮宮女淚漣漣
事主誰知不盡年
太后宣傳許降國
巴延丞相到簾前

亂點連聲

一作花底傳籌

殺六更熒熒庭燎待天明

一作風吹庭燎滅還

明

侍臣已寫歸降表

一作奏罷降元表

臣妾僉名謝道清

衣冠不改只如先
關會通行滿市廛
北客南人成買賣

京城依舊使時錢

北師要討撒花銀官府行移逼市民丞相巴延猶有語
學中要揀秀才人

湧金門外雨晴初多少紅船上下趨龍管鳳笙無韻調
却撾戰鼓下西湖

南苑西宮棘露牙萬年枝上亂啼鴉北人環立欄干曲
手指紅梅作杏花

巴延丞相呂將軍收了江南不殺人昨日太皇請茶飯

滿朝朱紫盡降臣

賈魏公出師

奏罷出師表翻然辭廟堂
千艘空寶玉萬馬下錢塘
闕許命真主欺孤欲假王
可能清海岱宗社再昌唐

孫殿帥從魏公出師

我宋麒麟閣功當向上名
出師休背主誓死莫偷生
社稷逢今日英雄在此行
勿為兒女態一笑欲傾城

魯港敗北

夜半搥金鼓南邊事已休三軍坑魯港一舸走揚州星
殞天行泣江喧地欲流欺孤生異志回首媿東關

北師駐皋亭山

錢塘江上雨初乾風入端門陣陣酸萬馬亂嘶臨警蹕

三宮垂淚濕鈴鸞童兒空想

一作
賸遣

追徐福厲鬼終當滅

賀蘭苦議和親休練卒

一作苦說和
親能活國

嬋娟剩遣

一作
應是

嫁

呼韓

杭州

有客回陽九無人髮握三關中新約法江左舊清談鐵
騎來天北樓船過海南一枝巢越鳥八繭熟吳蠶
天也今如此人乎可奈何臺邊西子去宮裏北人過玉
樹歌方息金銅淚已多旌旗遮御路舟楫滿官河

杭州雜和林石田

石田林處士唵鏡靜無塵亂後長如醉愁來不為貧飯
蔬留好客筆硯老斯人近法秦州體篇篇妙入神

先生忘富貴久客幸平安髮已千莖白心猶一寸丹衣

冠前進士家世舊郎官醉入烏程里吟登李杜壇

逃難藏深隱重逢出近詩乾坤一反掌今古兩愁眉我
作新亭泣君生舊國悲向來行樂地夜雨盡塗泥

蠋也吞聲哭潛行到水頭人誰包馬草子獨取羊裘北
面生何益南冠死則休百年如過翼撫掌笑孫劉

一春雲幕幕三月雨淋淋魚菜不歸市鶯花空滿林人
行官巷口兵簇御街心老子猖狂甚猶歌梁父吟

烽火來千里狼烟渡六橋嶺寒蒼兕叫江曉白魚跳壯

士披金甲佳人弄玉簫偶餘尊酒在聊以永今朝

躡足封韓信剖心嗔比干河山千古淚風雨一番寒世
指鹿為馬人呼鳥作鸞江頭潮洶洶城脚水漫漫

吟身春共瘦獨立望江亭越水荒荒白吳山了了青軍
降欣解甲民喜罷抽丁拍碎闌干曲吞聲血淚零

此夕知誰夕游船雜戰船山河空百二宮闕謾三千雨
歇雲垂地潮平水接天惜哉無祖逖誰肯着先鞭

陵廟成焦土宮牆沒野蒿亡秦皆趙李佐漢獨蕭曹國

子乘黃貴山人衣白高飛埃猶黯黯逝水正滔滔
靜看縱橫士翻成買賣兒禁中驚戰鼓城上出降旗魏
操非無漢唐高不有隋從茲更草後寧復太平期

偶出西湖上新蒲綠未齊攜來鱖縮項買得蟹團臍問
酒入新店喚船行舊堤亂離多殺戮水畔幾人啼

天目絲絲雨江頭剪剪風鼓鞀千艇合刁斗萬家同金
馬憐焦土銅駝壓草叢杞天愁欲墮黑入大陰中

日月往來轂乾坤生殺機江春蛟妾舞塞煖雁奴歸送

客詩添債愁城酒破圍如何秦相國昨夜酖韓非
如此只如此無聊酒一尊江山猶昨日笳鼓又新元黑
潦迷行路黃埃入禁門皋亭山頂上百萬漢軍屯

世變長椎髻時更短後衣魏庭翁仲泣唐殿子孫非樹
禿鴉爭集梁空燕自歸斷橋春已莫無限柳花飛

春去雨方歇水流花自飛人生螻螳夢世道

闕

衣日

月東西驛乾坤闔闢斯令無二子空有首陽薇
假途虞滅虢嘗膽越吞吳黑白一棋局方圓八陣圖是

翁猶矍鑠諸老自揶揄喟嘆投麟筆悲歌擊唾壺

竟夕柴門掩無心接縉紳山中多樂事世上少全人諸

呂幾亡漢商翁不仕秦柴桑深僻處亦有晉遺民

天下愁無盡生前樂有涯文章一小技富貴總虛華塵

入金張宅草生王謝家可憐三日火不見八姨車

休休休休休干戈盡白頭諸公雲北去萬事水東流春

雨不知止晚山相對愁呼童携斗酒我欲一登樓

錢塘

躑躅吞聲淚暗傾杖藜徐步浙江行平蕪古路人烟絕
綠樹新墟鬼火明事去玉環沉異域愁來金盃出佳城
十年草木都糜爛留得南枝照淺清

錢塘歌

錢塘江上龍光死錢王宮闕今如此白髮宮娃作遠遊
漠漠平沙千萬里西北高樓白雲齊欲落未落日已低
古人不見今人去江水東流烏夜啼

又

西塞山邊日落處北關門外雨來天
南人墮淚北人笑
臣甫低頭拜杜鵑

北征

北帥有嚴程挽我投燕京挾此萬卷書
明發萬里行出門隔山嶽未知死與生
三宮錦帆張粉陣吹鸞笙遺民拜路傍
號哭皆失聲吳山何青青吳水何泠泠
山水豈有極天地終無情回首叫重華
蒼梧雲正橫

宋宮人分嫁北匠

皎皎千嬋娟盈盈翠紅圍輦來路迢遞梳鬟理征衣復
采鴛鴦花綴之連理枝憂愁忽已失歡樂當自茲君王
不重色安肯畱金閨再令出宮掖相看淚交垂分配老
斲輪強顏相追隨舊恩棄如土新寵豈所宜誰謂事當
爾苦樂心自知含情理金徽煩聲亂朱絲一彈丹鳳離
再彈黃鵠飛已恨聽者少更傷知音稀吞聲不忍哭寄
曲宣餘悲可憐薄命身萬里榮華衰江南天一涯流落
將安歸向來承恩地月落夜烏啼

酬王昭儀

愁到濃時酒自斟
挑燈看劍淚痕深
黃金臺愧少知己
碧玉調將空好音
萬葉秋風孤館夢
一燈夜雨故鄉心
庭前昨夜梧桐雨
勁氣蕭蕭入短襟

太皇謝太后挽章

笳鼓喧吳越
傷心國破時
雨闌花洒淚
烟苑柳顰眉
事去千年速
愁來一死遲
舊臣相弔後
寒月墮燕支

大漠陰風起
羈孤血淚縣
忽聞天下母
已赴月中仙
哀

樂浮雲外榮枯逝水前遺書乞骸骨歸葬越山邊

平原郡公夜宴

春事闌珊夢裏休他鄉相見淚空流柳搖楚館牽新恨
花落吳山憶舊遊渴想和羹梅已熟饑思進飯麥初收
瀛洲歸去琅玕長月朗風薰十二樓

平原郡公趙福王挽章

大王無起日草木盡傷悲生在太平際死當離亂時南
冠流遠路北面辛全屍舊客行霜霰呼天淚濕麾

答同舍杜德機

北風吹我上金臺
忍見蛾眉墮馬嵬
宴罷蟠桃王母去
江南腸斷賀方回

答方石田

南朝千古傷心事
每閱陳編淚滿襟
我更傷心成野史
人看野史更傷心

答徐雪江

十載高居白玉堂
陳情一表乞還鄉
孤雲落日度遼水

匹馬西風上太行行橐尚留官裏俸賜衣猶帶御前香
只今對客難為答千古中原話柄長

御宴蓬萊島

曉日重闈對冕旒內家開宴擁歌謳駝峯縷割分金盃
馬乳時傾泛玉甌禁苑風生亭北曲寢園月轉殿西頭
山前山後花如錦一朶紅雲侍輦遊

幽州歌

漢兒辮髮籠氍毹日暮黃金臺上立臂鷹解帶忽放飛

一行塞雁南征泣

幽州除夜醉歌

燕姬壓酒春宵永
列炬搖光拂紅影
銀鴨香烘雲母屏
綺窗繡閣流芳馨
晚管聲含蘭氣嬌
鳳釵拖頸烏雲飄
錦瑟無端促絃急
纖娥斂翠翻成泣
雕龍啁哳雞鳴早
一笑紅顏鏡中老

除夕同舍集飲

萬里陰寒淚欲流
暫時歡笑且忘憂
已呼赤腳來烹雁

更遣蒼頭為割牛
燕妓女來情不惡
魯男子在話難投
却憐半夜朝天去
霜瓦差差絳玉樓

幽州會飲

客路相逢在異鄉
佐樽先得杜韋娘
舞迴錦臂花爭艷
醉吸金波月鬪光
他日未忘今日樂
老年須記少年狂
五陵遊俠休相笑
歸去奚奴有錦囊

夷山醉歌

楚狂醉歌歌正發
更上梁臺望明月
西風獵獵吹我衣

絕代佳人皎如雪
搥羯鼓彈箏篴烹羊宰牛坐糟丘
一笑再笑揚清謳
遙看汴水波聲小錦纜忘還事多少
昨日金明池上來
艮嶽淒涼煙霧繞
麥青青黍離離萬年
枝上鴉亂啼
二龍北狩不復返
六龍南渡無還期
金銅淚迸露盤濕
畫闌柱柱酸風急
鳩居鵲構侵曉入
爵奪燕巢當牕立
東南地陷妖氛黑
雙鳳高飛海南陌
吳山日落天沉沉
母子同行向天北
關河萬里雨露深
小儒何必悲苦辛
歸來耳熱忘頭白
買笑揮金莫相失
呼奚

奴吹簫簾美人縱復橫今夕復何夕楚狂醉歌歌欲輟
老猿為我啼竹裂

嗚呼再歌兮花滿臺好月為我光徘徊人生在世不滿
百紛華過眼皆成灰夷山青青汴水綠西北高樓咽絲
竹美人十指纖如玉為我行觴歌一曲含宮嚼徵當窗
牖露脚斜飛濕楊柳就中有客話陳橋如此山河落人
手客且住聽我語楚漢中分兩丘土七雄爭戰摠塵埃
三國鶯花浩無主咸陽宮殿不復都華清池沼溫泉枯

世間興廢奔如電滄海桑田幾回變人生得意且盡歡
何須苦苦為高官人生有命且行樂何必區區嘆牢落
遮莫金章與玉珂何如桐江披釣簑遮莫貂蟬貴此身
何如柴桑漉酒巾君不見海上看羊手持節饑來和雪
扣檀啣又不見飯顆山頭人見嗤愁吟痛飲真吾師美
人勸我酒有客有客聽我歌須臾客醉美人睡我亦不
知天與地嗚呼再歌兮無人聽月自落兮酒未醒

燕歌行

北風刮地愁雲濃草木爛死黃塵蒙
搥鞞伐鼓聲鏦鏦
金鞍鐵馬搖玲瓏將軍浩氣吞長虹
幽并健兒膽力雄
剛車軋軋馳先衝甲戈相撥聲摩空
雁行兼貫彎角弓披
霜踏雪渡海東
鬪血浸野吹腥風
捐軀報國效死忠
鼓衰矢竭誰收功
將軍卸甲入九重
錦袍宣賜金團龍
天子賜宴葡萄宮
烹龍魚鸞割駝峯
紫霞湫灩琉璃鍾
天顏有喜春融融
乞與窈窕雙芙蓉
虎符腰佩官蓋穹
歸來賀客皆王公
戟門和氣春風中
美人左右好花紅
朝

歌夜舞何時窮豈知沙場雨濕悲風急冤魂戰鬼成行泣

居延

憶昔蘇子卿持節入異域淹留十九年風霜毒顏色
嚙羶曾牧羝跣足步沙磧日夕思漢君恨不生羽翼一朝
天氣清持節入漢國肩子生別離回視如堆礫丈夫抱
赤心安肯淚沾臆

長城外

飲馬長城窟馬頭水枯竭水竭將奈何馬嘶不肯歇君

看長城中盡是骷髏骨
骷髏幾千年猶且未滅沒
空啣千年冤此冤何時雪
祖龍去已遠長城久迸裂
嘆息此骷髏夜夜江秋月

寰州道中

窮荒六月天地有一尺雪
孤兒可憐痛哀哉淚流血
書生不忍啼尸坐愁欲絕
輦鼓夜達明角笳競於悒
此時入骨寒指墮膚亦裂
萬里不同天江南正炎熱

山東飛放

天子出獵山之東臂鷹健卒豪且雄我欲從之出雲中
坐看萬馬如遊龍

潼關

蔽日烏雲撥不開昏昏勒馬度關來綠蕪逕路人千里
黃葉郵亭酒一杯事去空垂悲國淚愁來莫上望鄉臺
桃林塞外愁烟起大漠天寒鬼哭哀

函谷關

西風吹我度函關古壑泉聲靜自閒老子騎牛沙上去

仙人化鶴苑中還，斷厓水脫縣殘日絕域雲橫失好山。
舊說度關朱履客，一聲雞唱翠微間。

畫溪酒邊

夜來飲酒醉如何，酒醒方知事轉多。趙國未衰廉藺在，
齊城將下酈韓過。鵲飛月樹無依所，龍入風江謾作波。
忽有好詩來眼底，畫溪擲板唱漁歌。

常州

渡頭風起柳搖絲，丁卯橋邊屋已稀。河草青青淮馬健，

江花冉冉海鷗肥一樽酒對三人飲八字帆分兩岸飛
天末有人難問信仲連東去不須歸

石頭城

石頭城上小徘徊世換僧殘寺已灰地接汴淮山北去
江吞吳越水東來健魚奮鬣隨蛟舞快鶻翻身獵雁回
一片降旗千古淚前人留與後人哀

金陵

只見空城不見臺客行搔首共徘徊風雲舊日龍南渡

宇宙新秋雁北來三國衣冠同草莽六朝宮殿總塵埃
交游相見休相問把手江頭且一杯

揚州

重到揚州十載餘畫橋雨過月模糊后皇廟裏花何在
煬帝堤邊柳亦枯陂麥青青嘶亂馬城蕪冉冉落羣烏
人生聚散愁無盡且小停鞭向酒壚

徐州

白楊獵獵起悲風滿目黃埃障太空野壁山墻彭祖宅

落花衰草項王宮古今盡付三杯外豪傑同歸一夢中
更上層樓見城郭亂鴉古木夕陽紅

邳州

身如傳舍任西東夜榻荒郊四壁空鄉夢漸生燈影外
客愁多在雨聲中淮南火後居民少河北兵前戰鼓雄
萬里別離心正苦帛書何日寄歸鴻

涿州

蘆溝橋下水泠泠落木無邊秋正清牧馬亂鋪黃帝野

秋鷹高磨涿州城柳亭日射旌旗影花館風傳鼓吹聲
歸客偶然舒望眼酒邊觸景又詩成

通州道中

一片秋雲妬太虛窮荒漠漠暮栖烏西瓜黃處藤如織
北棗紅時樹若屠雪塞擣砧人戍遠霜營吹角客愁孤
幾回兀坐穹廬下賴有葡萄酒熟初

封丘

今夜宿封丘明朝過汴州雲橫遮遠塞水落見長洲樹

折棗初剥藤枯瓜未收傾囊沽一斗聊以慰羈愁

江陵

月到荆江上輕帆莫遠揚水搖龍影動風送雁聲長北
斗回秋柄南辰耿夜光徘徊舒一嘯詩興落瀟湘

巴陵

重到巴陵秋正清岳陽城下繫孤舫江湖萬里水雲濶
天地一涼河漢明月出洞庭魚婢舞氣蒸夢澤雁奴腥
篙工又鼓瀟湘柁漁笛漁榔上下鳴

蜀道

蜀道難行高接天
秦關勒馬望西川
峨眉岑律知何處
劒閣崔嵬若箇邊

長沙

洞庭過了浪猶高
河伯欣然止怒濤
傍岸買魚仍問米
登樓呼酒更持螯
湘汀暮雨幽蘭濕
野渡寒風古樹號
詩到巴陵吟不得
屈原千古有離騷

成都

錦城滿目是烟花處處紅樓賣酒家坐看浮雲橫玉壘
行觀流水盪金沙巴童棧道騎高馬蜀卒城門射老鴉
見說近來多盜跖夜深戰鼓不停撾

聞父老談兵

昔聞天兵入西蜀鞞鼓亂撾裂巖谷金鞍戰馬踏雲梯
日射旌旗紅簌簌黑霧壓城塵障天西方殺氣成愁烟
釣魚臺畔古戰場六軍戰血平三川天寒日落愁無色
將軍一劒萬人敵婦女多在官軍中兵氣不揚長太息

答相公席上

燕雲遠使棧雲間，便遣郛筒助客歡。
閃閃白魚來丙穴，綿綿紫雀出巴山。
神仙縹緲艷金屋，城郭繁華號錦官。
萬里橋西一回首，黑雲遮斷劔門關。

歌妓許冬冬攜酒郊外小集

益州歌妓許冬冬，客裏相逢似燕鴻。
醉擁蜀琴抽白雪，舞迴班扇割西風。
山魚野饌荒齋裏，浪蕊浮花古寺中。
偶爾留連借餘景，出門一笑夕陽紅。

隆州

歇馬隆州借夕涼
壺中薄酒似酸湯
城濠借屋偏栽柳
市井人家却種桑
官逼稅糧多作孽
民窮田土盡拋荒
年來士子多羌役
隸籍鹽場與錦坊

彭州

我到彭州酒一觴
遺儒相與話淒涼
渡江九廟歸塵土
出塞三宮坐雪霜
歧路茫茫空望眼
興亡滾滾入愁腸
此行歷盡艱難處
明月繁華是錦鄉

彭州歌

彭州昔號小成都
城市繁華錦不如
尚有遺儒頭雪白
見人猶自問詩書

彭州又曰牡丹鄉
花月人稱小雒陽
自笑我來逢八月
手攀枯幹舉清觴

漢州

馬踏巉巖緩着鞭
漢州城外看青天
雲橫古嶂吞殘日
風捲崇岡起暮烟
地拔翠峰森似筍
溪明錦石小如錢

官郵

闕

足出門去信口語言詩未圓

綿州

綿州八月秋氣深芙蓉溪上花陰陰使君喚船復載酒
書生快意仍長吟擊鼓吹笙勸客飲脫巾露髮省日沉
歸來不知其所往但見月高松樹林

永康軍

錦城飛馬過青城無奈風聲更雨聲一夜不眠何似者
籌花賭酒到天明

萬州

槎牙鳥道没人烟
荆棘縱橫馬不前
四面青山藏白跼
萬州城下草連天

重慶府

鐵作篙師鐵作舟
風撞浪湧可無憂
林間麋鹿遙相望
峽裏蛟龍橫不休
目斷弔橋空峭峭
頭昏伏枕自悠悠
錦城秋色追隨盡
好處山川更一遊

涪州

曉立驗檣烏時聞鳥獸呼
斯須風力健遮莫水程迂
赤岸日稠疊白鹽山獨孤
眼前猶有險不盡更危途

瀘州

復作瀘州去輕舟疾復徐
峽深藏虎豹谷暗隱樵漁
西望青羌遠南瞻白帝迂
暗嵐侵簟枕寒露濕衣裾
野沼荷將盡山園荔已疎
長官相見後置酒斫鯨魚

榮州

醉倚高樓上裁詩得五言
蠶叢雲幕幕鳥道月昏昏
妓

女吹金管庖丁洗玉盆客癡渾不寐府主更開樽

戎州

豪士家園為我開樹頭樹底錦堆堆書生大嚼真快意
不枉戎州走一迴

錦荔戎州第一奇大如雞子壓枝垂金刀剪下三千顆
對客從容把酒卮

客馬勞人事已灰長安無復使人來滿園翁蔚千千樹
盡是楊妃死後栽

錦樹高低種萬顆歲收百斛足生涯八錢買得一斤重
魯直詩中特地誇

錦殼中間玉一團樹高數丈實難攀瀘戎顆顆甜如蜜
變梓累累味薄酸

潼州歌

潼州待我洗吟眸如此江山是勝遊紅袖鬪歌纔拍手
綠鬟對舞盡纏頭箜篌急撚風生座鼙鼓連撾月上樓
一夜不眠雞戒曉又騎鋪馬過綿州

興元府

秋風吹我入興元下馬荒郵倚竹門
詩句未成雲渡水酒杯方舉月臨軒
山川寂寞非常態市井蕭條似破村
官吏不仁多酷虐逃民餓死棄兒孫

利州

雲棧遙遙馬不前風吹紅樹帶青烟
城因兵破慳歌舞民為官差失井田
巖谷搜羅追獵戶江湖刻剝及漁船
酒邊父老猶能說五十年前好四川

隆慶府

雁山突兀插青天
劒閣西來接劒泉
如此江山快人意
滿船載酒下潼川

閬州

閬州城南海棠溪
客子不可無新詩
正嫌風攪浪花碎
更被雨衝雲葉垂
野鷗出沒底心性
山禽飛舞猶威儀
江南或問閬州景
錦屏山水天下奇

鳳州

鳳州山館有清輝古木扶疎散陸離紅尾錦雞鳴古埭
綠頭花鴨盪幽池荷聲策策秋來後桂影團團月上時
病馬啣菱思故櫪驚鳥遶樹宿何枝三分割據人如夢
滿目興亡客似癡走筆成詩聊紀實良莠風土出蹲鴟

鳳州歌

鳳州南去是南岐大散橫盤勢更危躍馬紫金河畔路
萬枝楊柳撒金絲

去路迢迢入兩當三千三百到華陽黃花川上黃花驛

千百猿聲斷客腸

和人賀楊僕射致仕

蓮府公卿拜後塵手持優詔挂朱輪
從軍幕下三千客聞禮庭中七十人
飾帳麗詞推北巷畫堂清樂掩南鄰
豈同王謝山陰會空叙流杯醉暮春

初庵傅學士歸田里

燕臺同看雪花天別後音書雁不傳
紫閣笑談為職長彤闈朝謁在班前
揮毫屢掃三千字把酒時呼十四絃

聞已挂冠歸故里尚多宣賜鈔成船

酬方塘趙待制見贈

久謂儒冠誤窮愁方棄書十年心不展萬里意何如
司馬歸無屋馮驩出有車吾曹猶未化爛醉且穹廬

酬隱者劉桃岡

食既彈長鋏囊懸少錯刀功名須汝輩詩酒且吾曹
強項貧而樂揚眉氣自豪北來魚字密南去雁書高
擬折淵明柳重尋夢得桃明珠忽委贈價重九方皋

曾平山招飲

老貌不隨俗固窮而隱居一塢百竿竹八窗千卷書酌
以旋芻酒薦之新網魚興盡出門去晚涼山雨餘

答林石田見訪

偶攜降幟立詩壇剪燭西窗共笑觀落魄蘇秦今席暖
猖狂阮籍尚羶寒山中客老千莖白海上人歸一寸丹
世事本來愁不得乾坤只好醉時看

答開先老子萬一山

廬山五老招我此行我琴不鼓無虧無成

萬安殿夜直

鳳啣紫詔下雲端千載明良際遇難金闕曉明天表近
玉堂夜直月光寒宮衣屢賜恩榮重御宴時開禮數寬
却憶玄都人去後桃花零落倚闌干

張平章席上

兩鬢蕭蕭不耐秋興來今日謁公侯舞餘燕玉錦纏頭
又着紅韉踢繡毬

題汪導像

秦淮浪白蔣山青西望神州草木腥
江左夷吾甘半壁只緣無淚灑新亭

浮丘道人招魂歌

有客有客浮丘翁一生能事今日終
啣羶雪窖身不容寸心耿耿摩蒼空
睢陽臨難氣塞充大呼南八男兒忠
我公就義何從容名垂竹帛生英雄
嗚呼一歌兮歌無窮魂招不來何所從

有母有母死南國天氣黯淡殺氣黑忍埋玉骨崖山側
蓼莪劬勞淚沾臆孤兒以忠報罔極拔舌剖心命何惜
地結萋弘血成碧九泉見母無言責嗚呼二歌兮歌復
憶魂招不來長嘆息

有弟有弟隔風雪音信不通雁飛絕獨處空廬坐縲絏
短衣凍指不能結天生男兒硬如鐵白刃飛空肢體裂
此時與汝成永訣汝于何處收兄骨嗚呼三歌兮歌聲
咽魂招不來淚流血

有妹有妹天一方良人去後逢此殃黃塵暗天道路長
男呻女吟不得將汝母已死埋炎荒汝兄跣足行雪霜
萬里相逢淚滂滂驚定拭淚還悲傷嗚呼四歌兮歌欲
狂魂招不來歸故鄉

有妻有妻不得顧饑走荒山汗如雨一朝中道逢狼虎
不肯偷生作人婦左掖虞姬右陵母一劍捐身剛自許
天上地下吾與汝夫為忠臣妻烈女嗚呼五歌兮歌聲
苦魂招不來在何所

有子有子衣裳單皮肉凍死傷其寒蓬空煨燼不得安
叫怒索飯饑無餐亂離走竄千里山荆棘蹲坐膚不完
失身被繫淚不乾父聞此語摧心肝嗚呼六歌兮歌欲
殘魂招不來心鼻酸

有女有女清且淑學母曉粧顏如玉憶昔狼狽走空谷
不得還家收骨肉關河喪亂多殺戮白日驅人夜燒屋
一雙白壁委溝瀆日暮潛行向天哭嗚呼七歌兮歌不
足魂招不來淚盈掬

有詩有詩吟嘯集紙上飛蛇歎香汁杜陵寶唾手親拾
滄海月明老珠泣天地長留國風什鬼神護呵六丁立
我公筆勢人莫及每一呻吟淚痕濕嗚呼八歌兮歌轉
急魂招不來風習習

有官有官位卿相一代儒宗一敬讓家亡國破身飄蕩
鐵漢生擒今北向忠肝義膽不可狀要與人間留好樣
惜哉斯文天已喪我作哀章淚悽愴嗚呼九歌兮歌始
放魂招不來默惆悵

宋詩鈔卷一百五

欽定四庫全書薈要卷二萬三百五十九

集部

宋詩鈔卷一百六

內閣中書舍人吳之振編

梁棟隆吉集鈔

棟字隆吉其先湘州人生於鄂州後遷居鎮江弱冠領漕薦登戊辰第選寶應簿調錢塘仁和尉入帥幕一時聲名張甚旋避地建上丙子宋亡歸武林弟柱字中砥入茅山從老氏學棟往依焉庚寅遭詩禍

名益著時往來茅山建康間江東人士從者甚衆乙
巳無疾卒平日好吟詠稿無存者門人問故曰吾詩
堪傳人將有腹稿在宋遺民之嚼然者也

大茅峯

杖藜絕頂窮追尋青山世路爭嶮嶇碧雲遮斷天外眼
春風吹老人間心大龍上天寶劍化小龍入海明珠沉
無人更守玄帝鼎有客欲問秦皇金顛崖誰念受辛苦
古洞未易潛幽深神光不破黑暗腦山鬼空學離騷吟

我來俯仰一慨慷山川良昔人民今安得長扛撐日月
華陽世界收層陰一聲長嘯下山去草木為我留清音
四禽言

不如歸去錦官宮殿迷烟樹天津橋上一兩聲叫破中
原無住處不如歸去

脫却布袴貧家能有幾尺布織盡寒機無得裁可人不
來廉叔度脫却布袴

行不得也哥哥湖南北春水多九疑山前叫虞舜奈此

乾坤無路何行不得也哥哥

提葫蘆年來酒賤頻頻沽衆人皆醉我亦醉哀哉誰問
醒三問提葫蘆

金陵廢宮

六代俄然又一唐青山坐閱幾興亡心知江左非王業
口說中原是帝鄉落日有時登北固春風吹夢過錢塘
荆墳檜宅依然在留與烏衣話短長

鳳凰臺

白髮久孤鸚鵡杯
碧梧自老鳳凰臺
管夷吾亦僅如許
李謫仙今安在哉
城郭是非秋雨外
江山形勝暮潮來
小留只等中秋月
且放青冥萬里開

白鷺亭

荻花蘆葉老風烟
獨上秋城思渺然
白鷺不知如許事
赤鳥又隔幾何年
六朝往事秦淮水
一笛晚風江浦船
我輩人今竟誰許
只堪漁艇夕陽邊

雨花臺

孤雲落日倚西風，歷歷興亡望眼中。
山入六朝青未了，江浮五馬恨無窮。
客愁已付蒲萄綠，逕雨空餘瑪瑙紅。
我亦欲談當世事，無人喚醒紫髯翁。

題寅叔小園

深巷渾無市井喧，主人有客便開樽。
數竿修竹三間屋，幾樹閒花一畝園。
楚岫和雲移怪石，秦淮流月下高原。
此身且比淵明樂，母在高堂子候門。

久雨有感二首

冥雲生八荒驟雨忽然至中宵揭屋破漏濕無處避牀
牀不得乾僵立見憔悴嬌兒莫啼哭少頃待晴霽
少年不學稼老大生理拙入山採黃精窮冬一尺雪虎
狼正縱橫原野有白骨傷心重傷心吾饑何足恤

贈嘉興徐同年

憶昔青龍在戊辰馬蹄同踏杏園春歸田令尹空書晉
執戟郎君盡美新萬事不醒中酒聖一貧無奈訟錢神
相逢莫效窮途泣自古求仁要得仁

野水孤舟

前村雨過溪流亂
行路迷漫都間斷
孤洲盡日少人來
小舟繫在垂楊岸
主人空有濟川心
坐見門前水日深
袖手歸來茅屋下
任他鷗鳥自浮沉

黃葵

乾坤有正氣
間色皆為臣
名葩據中央
紅紫誰敢隣
傾日不忘君
衛足恐傷身
冥然無知識
忠孝出本真
林林
天地間
戴履而為人
明靈秀萬物
孰不尊君親
嗟嗟叔

季後利欲泯天倫邈哉望帝國產此瑞世珍九夏不趨
炎三月不爭春高秋風露冷孤標出清塵背時還獨立
攬芳淚沾巾

金陵三遷有感

憔悴城南短李紳多情烏帽染黃塵讀書不了平生事
閱世空存後死身落日江山宜喚酒西風天地正愁人
任他蜂蝶黃花老明月園林是小春

淵明攜酒圖

淵明無心雲纔出便歸岫東皋半頃秫所種不常有苦
恨無酒錢閒却持盃手今朝有一壺攜之訪親友惜無
好事人能消幾壺酒區區謀一醉豈望名不朽閒吟籬
下菊自傳門前柳試問劉寄奴還識此人不

春日郊游和友人韻

憶昔東風御柳斜枯腸一日萬周車壯心難起泥中絮
老眼羞看霧裏花巷陌幾家無主燕池塘一種為官蛙
江南寒食無烟火白晝沉沉似月華

送李北山歸建康


人生無百年胡為在遠道
遊子歸故鄉王孫怨芳草
有田歸去來無田歸亦好

貧賤有餓死富貴履危機
東海不可漁西山采無薇
四方已一氣我今將安歸

宋詩鈔卷一百六

謹案第二頁前三行伯顏應改已延但入詩平仄
不協姑仍其舊

--	--	--	--	--	--	--	--	--



總校官庶吉士臣張能照

校對官助教臣金學詩

謄錄監生臣江長鎰

財團
法人

佛陀教育基金會

釋淨空